

## 2.

### PAENITENTIARIA APOSTOLICA

Prot. N. 745/09/I

BEATISSIME PATER,

Eduardus Aldus Cerrato, Procurator Generalis Confoederationis Oratorii Sancti Philippi Nerii, reverenter exponit ter saecularem instare memoriam ex quo supremum obiit diem Beatus Sebastianus Valfré, tertius scilicet pater Congregationis Oratorii Taurinensis atque primus Sancti Philippi Nerii filius in Beatorum numerum relatus, qui in pauperes, infirmos et detentos in carceribus adiuvandos se totum impendit et amicitia enixaque caritate multos ad Christum perduxit. Ad hunc felicem eventum dignius celebrandum, in ipsa liturgica Beati memoria, iubilares peragentur functiones in omnibus sacris aedibus Oratorianorum pastoralis curae concreditis. Quo autem christifideles, sollempnia participantes, uberiores hauriant fructus spirituales, praefatus Orator donum Indulgentiarum a Sanctitate Tua pro illis fiducialiter implorat. Et Deus, etc.

Die VI Novembris MMIX

PAENITENTIARIA APOSTOLICA, de Summi Pontificis speciali mandato, Eiusdemque paternam benevolentiam perquam libenter significans, *plenariam* largitur *Indulgentiam*, suetis condicionibus (sacramentali Confessione, eucharistica Communionem et orationem ad mentem eiusdem Summi Pontificis) rite adimpletis, christifidelibus vere paenitentibus die trigesima mensis Ianuarii anno bismillesimo decimo lucranda, si cui sacrae functioni in honorem Beati Sebastiani Valfré peractae devote interfuerint, vel saltem coram Beati reliquiis et imaginibus publicae venerationi expositis, per congruum temporis spatium piis vacaverint considerationibus, concludendis Oratione Dominica, Symbolo Apostolorum, nec non invocationibus Beatae Mariae Virginis, Sancti Philippi Nerii et Beati Sebastiani Valfré: in Taurinensi Ecclesia Sancti Philippi Nerii, in singulis Sacellis Confoederationis Oratorii Sancti Philippi Nerii et in quocumque loco sacro quo Beatus publice colitur.

Pii christifideles senectute vel gravi morbo impediti, *plenariam* consequi valebunt *Indulgentiam*, si, iubilantibus celebrationibus se spiritaliter adiunxerint, suis precibus et doloribus, seu incommodis propriae vitae, misericordiae Deo oblatis.

Praesenti pro hac vice tantum valituro. Contrariis quibuscumque mine obstantibus.

De mandato Exc.mi Paenitentiarum Maioris  
+ Ioannes Franciscus Girotti, O. F. M. Conv.  
Ep. Tit. Metensis, Regens.

L. + S.

Ioannes Maria Gervais  
Ad. a Stud.